



29. januar 2015

UPA2015/134

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara.

Inissialiortitsinermi pisortat tapiissutaasa qanoq agguarneqarnissaannik ineqarnerlu pillugu aqqissuusseqqinnissaq qanoq ittoq Naalackersuisut Inatsisartunilu ilaasortat qanoq isumaliutersuuteqarpas?

(Inatsisartunut ilaasorta Ane Hansen, Inuit Ataqatigiit)

Sinerissami inoqarfinni tamani naapitassaajuartarput pisortat inissiarsuaataanni najugallit ilaatigut ukiut 40-t tikillugit najugaqarsinnaasartut inigisap aserfallatsaaliner piginnittunik malinnaaffigineqangikkaluortoq, inigisamulli akiliutiminnik akitsoraluttuinnartunik artorsaa-teqartunik.

Taamaalilluni ineqarnermut tapiissutit procentimut aalajangersimasumut pituttugaavoq, inoqutigiit isertitaat apeqqutaallutik. Taamaaliornikkut ineqarnermut tapiissutit immineri-saminnik nalikilliarortarput aningaasat nalikilliarortnerat ilutigalugu, tassami ineqarnermut tapisisartut tapisiat sinaakkutaannut allamut annikinnerusunik aningaasartalimmut piffissap ingerlanerani imminik pisumik nuuttoqartarmat.

Assersuutigalugu Nunatta Karsiata naatsorsuutai naapertorlugit 2013-imi ineqarnermut tapit 60 mio. kr-upput, ukiunili naatsorsuiffiusumi 2009-mi 70 mio. kr-ullutik¹. Taamaalillutik ineqarnermut tapit ukiut sisamat ingerlaneranni 4 mio kr missaanni ikileriarsimapput. Tamanna arlalippassuarnik peqquteqarsinnaavoq, kisianni aningaasat nalikilliarortnerat ilanngullugu naatsorsuutigineqarpas, ataatsimut isigalugu piffissami tassani qaffariar-simasariaqaraluarpoq.

Piffissami tassanerpiaq ineqarnermut akiliutit assigiinngitsunik procentalinnik qaffakkiartortuarsimapput, taamatullu akissarsiat. Kisianni ineqarnermut akiliutit aningaasat nalikilliarortnerisa annertoqataannik qaffakkiartunngillat, tamatumalu ataatsimut isigalugu nassataraa, pisortat illuutaasa - uagut maani Inatsisartuni akisussaaffigisatta – annertusiartuinnartumik aserfallakkiartornerat.

Taamaamat isumaqarpunga naapertuuttuussasoq oqallisigigutsigu, ineqarnermut tungasunik iluarsartuusseqqinnissamut atatillugu angusinnaaneripput, ineqarnermut akiliutit ukiut ingerlaneranni inissiatinut aningaasartuutivinnik matussusiisalnisaat, tassuunakkut inissiat illersorneqarsinnaasumik aqqissuunneqaqqullugit ilutigisaanillu isumaginninnermi kontot aqqutigalugit, inuiatigiinni artornartorsiornerpaat pisariaqartitaminnik ikiorserneqarnissaat qularnaarlugu.

Pisortat illuliortitsinermit ukiut tamaasa 400 mio.- kr.-nit missaat initaarnissamut tapiissutitut aningaasaliissutigisarpaat, taakkuli sisamararterutaannaat pissakinnerusut ineqarnermut tapiissuuteqarfingineqartarneranut atorneqartarlutik.

¹ Hovedkonto 30.11.10

Pissutsit taamaannerat naleqquttuursorinngilara aningaasarsiarissaartut suliffeqarfiutillillu namminneq akiliisinnaassuseqareersut inissanik akisuunngorlugit attartorteqqitassanik aningaasarpassuarnik tapiiffigineqartarnerat. Illuatungaanilu pissakinnerusut pitsaanngitsumik aserfallatsaalisani akitsoraluttuinnartunilu najugaqartut.

Isumaqarpunga ullumikkut pissutsinut taarsiullugu aningaasat ineqarnermut atugassat siunnerfeqarnerusumut pisariaqartinneqarnerpaanullu atussagigut, taamaaliornikkullu ajornartorsiutit ullumikkut atukkavut iliuuseqarfigalugit.